

Ittoqqortoormiini umiarsualivissamik nutaamik Naalakkersuisut sanaartornissamut pilersaarusiornissamut (projektering) peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaq Mette Arqe-Hammeken, Naleraq)

Akissuteqaat

(Ineqarnermut, Attaveqaasersuutitut Isorliunerusunullu Naalakkersuisoq)

Siullermeerneqarnera

Naalakkersuisut sinnerlugit siunnersuuteqartoq Mette Arqe-Hammeken Naleqqameersoq Inatsisartut aalajangiiffigisassaattut siunnersuummik matuminnga saqqummiussineranut qutsavigaara. Attaveqaasersuutitut Isorliunerusunullu Naalakkersuisutut nuna tamakkerlugu talinnissamut periarfissanik pitsaasunik naleqquttunillu peqarnissaq pingaartilluinnarpara. Taamaattumik tamannarpiaq peqqutigalugu Ittoqqortoormiini pissutsit uannut isumaqartorujussuupput.

Inuiaavugut ataatsit, nunami ataatsimiittut – qeqertarujussuaq najugarput akimorlugu ataqatigiissut. Attaveqaasersuutitut nukittortitsigaangatta sumiiffiit ataqatigiilersiinnarneq ajorpagut, aammali ataqatigiinnerput, uagutsinnut nunatut ataatsimoortitsisoq nukittortittarparput. Nunatta tamarmi – avannaaniit kujataanut, kangianiit kitaanut – assigiinnik periarfissaqarfiunissaa aammalu isigineqarluta, tusaaneqarluta salliutinneqarlutalu misiginissarput ataatsimoorluta akisussaaffigaarput.

Ittoqqortoormiini talinnissamut periarfissat nunap sinneranut naleqqiullutik allaanerupput. Ittoqqortoormiini sorlaat piniartut tulluusimaartut inuunerannut pituttorsimapput, taamaattumillu maannarpiaq pissutsit atuuttut kingunerisaannik umiarsuit angisuut usillu isumaginissaannut periarfissaqanngilaq, illoqarfinni allanisulli kilisaatit il.il. usingiarneqarsinnaanngillat, tamatuma kissaatigineqannginnera peqqutaanani, periarfissaqannginnerali peqqutaalluni.

Ittoqqortoormiini nunap immikkoortuani mittarfimmik sanasoqalerpat, umiarsuarmit illoqarfimmut atortorpasuarnik maskiinanillu ikaassuinissaq pisariaqalertussaavoq, suliaqartut taanna illoqarfimmi nunnigussinermut umiarsualiveqarnermullu nutaanik piomasagaateqarfiusussaavoq. Mittarfimmik sanaartortoqarnerani paasineqassappat umiarsualivik pisariaqartinneqassasoq, umiarsualiviup sumiitinneqarpat pitsaanerussanersoq sukumiisumik misissorneqassaaq.

Taamaattumik atuisussanik misissuineramik pisariaqartitsinernillu misissueqqissaarnermik suliaqartoqarnissaa tapersersorusuppara taamaasilluni pitsaasumik tunngavilimmik

Naalakkersuisut umiarsualivimmik sanaartortoqarnissaanut pilersaarummik
saqqummiussisinnaaniassammata kiisalu Ittoqqortoormiini siuariartornissamut
ineriartornissamullu sinaakkutinik pitsaanerusunik pilersitsillutik.

Taamaattumik allannguutissatut siunnersuummik, pilersaarusiornermut pitsaasumik
tunngaviliisinnaasumik saqqummiussinissara kissaatigaara.

Tamanna tunngavigalugu Naalakkersuisut allannguutissatut siunnersuut manna
saqqummiuppaat:

**”Ittoqqortoormiini umiarsualivissamik nutaamik atuisussanik
misissuinnermik pisariaqartitsinernillu misissueqqissaarnermik
Naalakkersuisut kingusinnerpaamik UKA2026-mut saqqummiussinissamut
peqquneqarnissaannik Inatsisartut aalajangiiffigisassaattut siunnersuut.”**

Taamatut oqaaseqarlunga immikkoortoq Inatsisartuni kajumittumik suliasanngorlugu
tunniuppara.